

27 OCT 2003

OIC-EKONOMI/I

MASA UNTUK NEGARA ISLAM PERERAT JALINAN EKONOMI

Oleh: Wan Nurzila Abdul Rahman

KUALA LUMPUR, 27 Okt (Bernama) -- Forum perniagaan yang julung-julung kalinya diadakan sempena Sidang Kemuncak Pertubuhan Persidangan Islam (OIC) jelas menunjukkan terdapat keperluan bagi negara-negara Islam memperatkan hubungan ekonomi, yang sepatutnya telah lama terjalin.

Deklarasi 11 perkara yang diterima pada akhir pertemuan dua hari itu sememangnya boleh membawa kepada kerjasama ekonomi yang lebih baik di kalangan negara anggota OIC kerana perkara-perkara yang dibangkitkan adalah sejajar dengan aliran liberalisasi dan globalisasi semasa.

Di bawah era semasa, tidak guna untuk negara Islam merengek tentang kegagalan memasuki pasaran negara maju sedangkan mereka sendiri gagal untuk menggunakan potensi yang ada di kalangan mereka.

Dengan jumlah penduduk melebihi satu bilion dan dianugerahkan pula dengan kekayaan sumber asli, mereka sebenarnya boleh membentuk satu pasaran baru yang besar.

Hasrat untuk negara Islam memperbaiki status perdagangan di kalangan mereka telah terbentang nyata jika dipandang kepada penyertaan dan kecenderungan negara anggota dalam forum perniagaan sempena Sidang Kemuncak OIC ke-10 di Putrajaya yang baru berlalu.

Antara pemimpin yang menghadiri forum itu ialah Presiden Pervez Musharraf dari Pakistan, Presiden Omar Hassan Ahmad al-Bashir dari Sudan, Presiden Sulejman Tihic dari Bosnia Herzegovina, Presiden Megawati Soekarnoputri dari Indonesia, Perdana Menteri Datuk Seri Abdullah Ahmad Badawi dari Malaysia, Timbalan Perdana Menteri Datuk Seri Abdullah Ahmad Badawi dari Malaysia, dan pemimpin Algeria, Abdelaziz Bouteflika.

Perdana Menteri Malaysia, selaku pengerusi OIC, Datuk Seri Dr Mahathir Mohamad sendiri telah merasmikan forum tersebut yang diadakan tepat pada masanya untuk mengajak ummah supaya bersatu ketika berhadapan dengan musuh-musuh politik dan ekonomi.

Dalam ucapan perasmian, Dr Mahathir menggesa negara Islam supaya bertindak dengan lebih padu dan berpegang teguh kepada prinsip asas pembentukan OIC.

Beliau turut memberi panduan bagaimana negara Islam boleh bergerak maju. Beliau berkata negara Islam tidak boleh menunggu semua 57 anggota OIC bersatu sebelum satu inisiatif dapat diambil.

"Kita tidak boleh menunggu. Kalaupun kita hanya berdua, kita boleh bekerjasama. Jika kita dapat 10, bilangan itu telah besar. Ia boleh berkembang akhirnya," katanya.

Di forum tersebut, antara yang dibahaskan ialah isu globalisasi, liberalisasi, perjanjian perdagangan dua hala, perdagangan elektronik dan perkongsian pintar.

Dan yang menjadi keutamaan ialah pembangunan perdagangan dan pelaburan dalaman OIC. Ia boleh dicapai dengan menggalakkan sektor perniagaan melabur dalam negara anggota dan menggalakkan aliran perdagangan dan pelaburan di kalangan anggota OIC.

Telah dipersetujui juga supaya forum sebegini diadakan setiap tahun.

Turut disyorkan supaya Bank Pembangunan Islam (IDB) memainkan peranan yang lebih besar untuk membiayai eksport dan import. Kerjasama teknikal di kalangan negara anggota juga dicadangkan.

Seruan juga dibuat supaya kerjasama serantau dibangunkan ke arah pembentukan Kawasan Perdagangan Bebas Islam (IFTA) dan Pasaran Bersama Islam (ICM).

Setiausaha agung OIC, Dr Abdelouahed Belkeziz, berkata kegagalan Pertubuhan Perdagangan Dunia (WTO) di Cancun, Mexico, untuk mencapai permuafakatan memberi pesanan jelas kepada dunia Islam supaya mula menggalakkan aliran pelaburan di kalangan mereka. -- BERNAMA

WNZ TJK JR